



ERicus filius fuit Gothori, nepos Gogi, et abnepos Magogi. hūc Gothi eo tempore quo Siggo apud Sueones regnabat, Anno mundi 2050. sibi regem elegerunt. erat enim multis artibus & disciplinis instructus: præterea magna fortitudine præditus. Itaque suis iustas & salutares leges, quatenus rudis illa ætas permisit, constituit, & Gothorū rempublicam in meliorem formam reduxit. Hinc factū ut aliqui ob res bene administratas eū primum ad Septentrionē Germanorū regē constituerunt. Cum etiā eius tēpore populi Septētrionales adeo multiplicati essent, ut Scandiana insula eos uix amplius caperet, magna hominum manus Erici regis

iussu uersus Occidentem ad uicinas insulas missa fuit, quæ longo pōst tempore Danicæ uel Cimbricæ insule nominatę fuerunt. In ijs locis noui incolæ diu sine rege uixerunt, atq; præfectis à regibus Sueonum constitutis paruerunt, donec tandem Humelus Gothorum rex post multa secula filium suum Danum ijs regem dederit, id quod suo loco explicabitur. Quamquam uerò Ericus optimis moribus esset præditus, id quod etiam rithmi in eius memoriam compositi, & pro more patrio decantati significant, tamen sub eo homines à patrum monitis declinātes, uarios idolorū cultus amplexi sunt. postea quoq; in omnis generis scelera, rapinas, furta, latrocinia, & libidines prolapsi, effecerunt ut per 400 & amplius annos in ijs locis nihil amplius memorabile factum fuerit. licet etiam scriptorum inopia multa uirtutis monumenta oblitterata sint, id quod postea ex maximis saxis, quibus uarijs figurarum lineamentis res memorabiles insculperūt, prudentiores cognoscere potuēre. Inter medio illo tempore rebus ijs in locis præfuerunt Vddo, Alo, Othen, Carolus, Biorno, Gethar, Gett, & alij, quorum solū nomina ex publicis Gothorum annualibus deprehensa sunt. Sueones uerò tunc ab eis diuisi, magna ex parte sub iudicibus egisse dicuntur. Ioan. Mag. Hist. Goth. lib. 1. cap. 8. & 13.